

ŠULSKE NOWINY



Serbska wyša šula Ralbicy
UNESCO projektna šula
www.sorbische-schule-ralbitz.de

smažnik 2025
30. lětnik, 293. wudaće

Rjadowniska jězba do Weimara

Wot 25. do 27.
nalětnika podaštej so
rjadowni 9/1 a 9/2 na
rjadownisku jězbu do
Weimara. Po tym zo
dojěždźechmy wutoru
popołdnu z ćahom do
Weimara, podachmy
so na měšćansku
rallye. Tuta započina
so na dźiwadłowym



naměšće z wulkej postawu Goetheho a Schillera. Zhonichmy mnohe zajimawe informacije k stawiznam města a jich wuznamnym wosobinam. K tomu słušataj spisowaćelej Goethe a Schiller, ale tež wójwodka (Herzogin) Anna Amalia, po kotrejž je znata biblioteka we Weimarje pomjenowana. Wobhladachmy sej znate městna, kaž wjerchowske rownišće (Fürstengruft), hdžež wotpočujetaj mjez druhim Goethe a Schiller. Jako běchmy zaso wróće na dźiwadłowym naměšće, mějachmy chwilku swobodneho časa, doniž so z busom dosrjedź lěsa podachmy. Daloko a šěroko njewidźachmy młodownju. Wona leži mjenujcy někotre sta metrow w lěsu. Po tym zo rozdźělchmy so do stwow, čakaše na nas stódnja wječer. Na druhi dzeń so po snědani na puć ke koncentraciskemu lěhwu Buchenwald podachmy. Zawodnje hladachmy film, w kotrymž někotři z tych, kotřiž běchu přežiwili, wo

ćežkim žiwjenju tam rozprawichu. Po tym wobhladachmy sej někotre twarjenja,



kiž njeběchu so zwottorhali. To běše chětro zatrašace. Naposledk wopytachmy muzej a jastwo koncentraciskeho lěhwa. Po hnujacym wopyće koncentraciskeho lěhwa wopytachmy muzej Schillera a Goetheho. Tu zhonichmy přez guide k słuchanju mnoho wo žiwjenju a bydlenju tuteju znateju wosobinow. Wječor wubědźowachmy so w bowlingu. Zajimawy dzeń zakónčichmy ze skazanjom pizzy. Posledni dzeń našeje jězby započina so z rumowanjom stwow a ze snědanju. Na planje steješe:

Bauhaus-muzej. W nim zhonichmy mnoho informacijow architekturneho stila a wobhladachmy sej nastroje z tutoho časa a tamnišeje šule. Nětko podachmy so na dwórnišćo a nakupowachmy sej prowiant za domojjězbu. Weimar ma woprawdže mnoho stawizniskich a architektoniskich pokładow a smy džakowni, zo smy tute nazhonjenja činili. Wutrobnje džakować chcemy so našim wučerjam knjezej Wowčerjej, knjezej Zahrodnikej, knjezej Klimankej a našej wučerce knjeni Koberowej, kotřiž su so wo organizaciju postarali a nam tak poradženu a wulkotnu rjadownisku jězbu zmóžnili. - tekst: Jakub Barč, wobrazaj: Křesćan Zahrodnik -

Ekskursija k „TDDK“


Rjadowni 9/1 a 9/2 podaštej so dnja 28.03.2025 z kolesom na zajimawy ekskurs k wulkej firmje z mjenom TDDK (TD Deutsche Klimakompressoren). Tuta firma produkuje klimowe kompresory, kotrež su cyle rozsudny džěl klimoweje techniki w awće. W firmje nas najprjedy ze serbskej tradiciju witachu, mjenujcy z chlěbom a selu. Potom so skrótka zapokazachmy a tura startowaše. Wona džěleše so do dweju wobtukow: džěłarnička a wjedženje po sektorach. W džěłarničkach zeznajomnichmy so z wobtukomaj lijernja a powołanjom mechatronikarja. Woboje

bě woprawdže jara zajimawe. Hakle při wjedženju pytnychmy, kak wulka tuta fabrika woprawdže je. Widželi smy wjele, na přikład wysoku pęc (Hochofen) a lijernju. Jedna wosebitosć je woprawdže wobdźiwajomna: Produkcija je zdžěla awtomatizowana. Fascinowani přihladowachmy roboteram při dźěle. Po stódnym wobjedže w kantine podachmy so z nowymi nazhonjenjemi a dožiwjenjemi na dompuć.

- tekst: Milan Borška -

Druhe a třeće městno do Ralbic

Třo šulerjo wosmeho lětnika wobdžělichu so 3. nalětnika na sakskej olympiadže rušćiny w Drježdźanach. Při tym doby Vanessa Rjenčec 2. městno. Třeće městno wobědžowanja wudoby sej Patricia Dittrichec a Jason Domš docpě predikat „z wuspěchom“. W sakskej stolicy běchu so wuknjacy wyšich šulow w štyrjoch cuzych rěčach wobědžowali, nimo rušćiny w jendželšćinje, francošćinje a španišćinje.



- tekst a wobraz: Jan Rjeda -

Wuspěšne wobdželenje na Olympiadže serbšćiny

Wot 26. do 28. nalětnika wob-džělichu so šěsć šulerjow a štyri šulerki našeho 6. lětnika na Olympiadže serbšćiny we Wodowych Hen-drichecach. Při powitanju zhonichmy temu za lětsa: lěs. Po tym zo smědžachmy do našich stwow, rozdžělichmy so do skupinow, kotrež nawjedowachu studenća. Po wobjedže a krótkej přestawce dóstachmy přeni nadawk. Na stacijach zhonichmy mnoho wo lěsu, drjewje a zwěrjatach. Nadawk nětko bě, z pomocu informacijow zhromadnje jako skupina přednošk přihotować. Pozdžišo sydaše wječer. Studenća

spřihotowachu wšelake hry za nas a wučerjow. To je nam wšěm wulke wjeselo činiło. Na druhim dnju mějachmy nadawk, nastawk napisać. Pozdžišo džěłachmy dale na našim přednošku. Po wječeri podachmy so na disko, hdžež rejowachmy a wjele wjesela mějachmy. Na poslednim dnju, nasyćeni wot snědanje, předstajichmy naš přednošk. Krótko na to slědowaše mytowanje. Noel Mikławšk a Franciska Metašec zdobyštaj sej zhromadnje ze skupinu přenje městno. Ja dobych druge městno w mojej rěčnej skupinje. To mnje jara zwjeseli. Kóždy dósta jedne wopismo. Podachmy so k wobjedu, zrumowachmy stwy a rozžohnowachmy so. Nětko podachmy so na domojjězbu.



- tekst: Liska Markulic, wobraz: Jan Rjeda -

INFORMACIJE - TERMINY - WŠELČIZNY

wot 05. do 20. smažnika

09. smažnika

19. smažnika

20. smažnika

wot 23. do 26. smažnika

27. smažnika

wot 27. smažnika do 08. žnjenca

praktikum 8. a 9. lětnika

swjatkowna póndžela

Bože ćěło

wotchadnička 10. lětnika w Šunowje

projektowe dny

posledni šulski dzeń

lěčne prózdniny